



Inatsisartunut ilaasortaq Per Rosing-Petersen, Partii Naleraq
MAANI

Greenland Minerals and Energy (Trading) A/S (GME) pillugu § 37 naapertorlugu apeqquteqaammut nr. 2016-019-imut akissuteqaat

Greenland Minerals and Energy (Trading) A/S-imi (GME A/S) piginnittut pillugit
Inatsisartut suleriaasianni § 37, imm. 1 naapertorlugu Naalakkersuisunut
apeqquteqarputit, tassani tunngavilersuutaasumi allaaserisat, aktiaatiliusinnaasup
tutsuiginassusaanik inatsisinillu malinnissinnaassusaannik apeqqusiisut
innersuussutigineqarlutik.

8. februar 2016
Sagsnr. 2016-1821

Postboks 930
3900 Nuuk
Tlf. (+299) 34 68 00
Fax (+299) 32 43 02
E-mail: mmr@nanoq.gl
www.naalakkersuisut.gl

Aallarniutigalugu oqaatigineqassaaq, allaaserisat marluk taakkua
innersuussutigineqartut 2009-imeersuummata, taamaalillutillu ukiut 6-it sinnerlugit
pisoqaassuseqarlutik.

1. Kuannersuarni aatsitassarsiorniarlutik qinnuteqalersaarnerakkassi GME A/S inunnik kikkunnik tunuliaquteqarnersut nalunngilisigit?

Akissut:

GME A/S, Greenland Minerals and Energy Ltd.-imit (GMEL), ASX-imi (Australian
Securities Exchange) Australien-imi aningaasanik niuerfimmi nalunaarsorsimasumit,
100 %-imik pigineqarpoq. Aktiaatillit katitigaanerit pillugu paasissutissat
australiamiut ingerlatseqatigiiffiat arlaannaannulluunniit attuumassuteqanngitsoq
"Advanced Share Registry Limited" aqutugalugu piniarneqarput. Paasissutissat
2016-imi januaarip 25-ianeersut pissarsiarineqarput.

Oqaatigineqarsinnaavoq maannakkorpiaq GMEL-imi aktiaatillit assigiinngitsut
katillugit 3.676-it nalunaarsorsimammata.

Australiami inatsisit ("Corporations Act 2001"-imi immikkoortoq 671B), naapertorlugit
aktiaatillip suleqatigisani peqatigalugit ingerlatseqatigiiffimmi aningaasanik niuerfimmi
nalunaarsorsimasumi taasisinnaatitaanerit 5 %-init annertunerusut pigigunigit,
tamanna nalunaarutigisussaavaa. Amerikamiut aningaasaatinut aningaasaateqarfia
aktiaatillinnit kisiartaavoq, taasisinnaatitaanerit 5 %-iinit annertunermik
pigisaqartussatut allassimasoq.

GMEL-imi aktiaatillinni ilaapput inuunnaat, sullissiviit aningaasaliisartut, aningaaseriviit
allallu ingerlatseqatigiiffiit. GMEL-imi aktiaatillit 3.676-iusut akornanni inunnik
imaluunniit ingerlatseqatigiiffinnik inatsisinik unioqqutitsisumik ingerlataqartutut
unnerluutigineqarsimasunik imaluunniit eqqartuussivimmi
pineqaatissinneqarsimasunik peqarnerisooq paasiniassallugu Naalakkersuisut
periarfissaqanngillat. GMEL immikkoortortaavoq inatsisit malillugit namminersorluni
pisussaaffeqartoq pisinnaatitaasorlu, tamatumalu saniatigut aktiaatillit
ileqqorlussimasinnaanerannut imaluunniit inatsisinik unioqqutitsillutik
iliuseqarsimasinnaanerannut akisussaatinneqarsinnaanani.

Oqaatigineqarsinnaavoq inuk apeqquteqartup innersuussutigisaa GMEL-imi pisortani
ilaanngimmat.

Aktiaatit ingerlatseqatigiiffinni aningaasanik niuerfimmi nalunaarsorsimasuni aktiaatit kikkunnit tamaginnit kiffaanngissuseqartumik niuerutigineqarsinnaapput, aammalu piiiaanissamik akuersissummik qinnuteqaatip suliarineqarnerani, ingerlatseqatigiiffinni piiiaanissamut akuersissummik qinnuteqarsimasuni, ingerlatseqatigiiffimmit Kalaallit Nunaanni nalunaarsorsimasumit pigineqartumi aktiaatilinnik Naalakkersuisut misissuisinnaangillat aammalu misissuisarniaratik.

Taamaattoq ingerlatseqatigiiffimmi aalajangiisuusussamik sunniuteqartumik allannguuteqartoqartillugu, aamma toqqaannangitsumik tunniussinertut taaneqartartumi, Naalakkersuisut akuersissuteqartussaapput.

Taamaallitutik Naalakkersuisut ingerlatseqatigiiffimmi aktianik niuernerit ataasiakkaat tamaasa akuersissuteqarfigisussaangilaat, kisianni taamaallaat niuernerit ingerlatseqatigiiffimmi aalajangiisuusussamik allannguuteqartitsinermik malitseqartussat akuersissuteqarfigisussaallugit. Tassunga atatillugu akuersissutip ataani pisussaaffinnik naammassinninnissamut tunngaviusut tunniussinermi ajornerulersinneqannginnissaat Naalakkersuisut misissortarpaat, ilanngullugu suliffeqarfiup pitsaassusilimmik ingerlanneqarneranut tunngaviusut suli atuunnersut.

2. Qanoq qulakkeerniarpsiuk maani sumilluunniit aallartitsiniarlutik qinnuteqassamaartut inuttaasa tatiginassusaat, atornerluiniartuunnginnerat, inatsisinillu unioqqutitsinngiivinnissaat?

Akissut:

Naalakkersuisut siullermik pingaarnertullu GME A/S-imi siulersuisunut aamma pisortaatitanut tunngasut isummersorfigaat aammalu GME A/S-ip ingerlataannik aalajangersimasunik pitsaassusilimmik oqartussaasutut suliarinninnerup qulakkeerneqarnissaanut pisariaqartunik isumalluutunik atugassiiniarlutik; soorlu Kalaallit Nunaanni aatsitassarsiorfinnut suliassanut allanut tunngatillugu taamatut pisoqartartoq.

GME A/S-ip australiamiut ingerlatseqatigiiffianni qullersaqarfiusumi GMEL-imi aktiaatillit imaluunniit pisortaatitat tassaappata inuit isornartoqartinneqartunik atugaqartut, aallaaviatigut Australiami oqartussaasut tamanna akisussaaffeqarfigaat, aammalu Australiami oqartussaasut akisussaaffitsik naammassissagaat, Naalakkersuisut tatigilluinnarpaat.

Kalaallit Nunaanni aatsitassarsiornermik ingerlatat malitassat qaffasissummik piumasaqaateqarfiusut malillugit ingerlanneqarnissaat Naalakkersuisut qulakkeerniarpaat, kisianni Kalaallit Nunata killeqarfiisa avataanni aatsitassarsiornermik ingerlatat inunnit tutsuiginartumik, unneqqarissummik inatsisinillu malinnilluni iliuuseqartartunit ingerlanneqarnerisut qulakkeernissaanut Naalakkersuisut piginnaatitaaffeqanngillat.

Taamatuttaaq sammisaq taanna pillugu apeqquteqarluni § 37 naapertorlugu apeqquteqaammut 2013-250-imut akissuteqaat aammattaq innersuussutiginneqarsinnaavoq.

Inussiarnersumik inuulluaqqusillunga



Randi Vestergaard Evaldsen